

Jeimsgören Kimbi

Jeimsnöñ Kimbiñi alök.

Jim-asa-asari

Gölmeñi gölmeñi miangören ambazip könäñi könäñi uruñini melenđa letorakzei, yeñgö ahakmemeninan siksauk lolonqalon aiga tönqangöba et enğuiga Anutugö qetbuñajan etpapuk. Miangöra Jerusalem bisop Jeims yañon goro keu murutñi murutñi qezaköba ki ohoza. Goro keuñi tosatñi kewö: Mötikutukutu ölni mi denöwö? Zioz nup ölni aka muneñi. Esapesap uruñe malmal. Tosatñi kude engek qepureime. Numbu jit galömkölköl. Sileñini möpöseime me uruñini memba et al anğume? Anğururuk me alabauk akñe? Kapañkapañ aka köuluk nup meme.

Waimanjatñi bohonñi kewö: Kraistkö Buñajan qariba aködamun-ğambuk akñapköra qetñi bisiba keuñi köl guliba meinga ölni asuhuma me qahö? Numbu jitinanök möt nariinga qahö dop kölja. Zioz ölni qahö mi köhömuñi qamöt tandök ewö akza.

Kimbi kiangö bahöñi bohonñi 10 mi kewö:

Keu mutukñi *1.1*
Mötnarip aka mötikutukutu *1.2-8*
Ambazip wanapñi aka pomñi *1.9-11*
Esapesap (manambatok) ölöpnñi aka bölöñi *1.12-18*
Buña kezapnöñök mötmöt aka temkölköl *1.19-27*
Etqeqeñi mi kude engek qepureime *2.1-13*
Mötnarip nupñi qahö mi omañi akza *2.14-26*
Numbu nesilamninan ayuhum neñgibapuk *3.1-18*
Luainöñ malmal me gölmegö ahakmeme *4.1-5.6*
Lömböt bisiba köuluköinga ölni asuhuma *5.7-20*

1 ¹Jeims nöñon Anutu aka Kembu Jisös Kraistkö nupñi memba maljal.

^a 1.1 Mat 13.55; Mak 6.3; Apo 15.13; Gal 1.19

Israel kambu 12 neŋgöreŋök tosatŋi iŋini Israel mosöta gölmeni gölmeni deŋda anda maljei, nöŋön embuk keu eraum mötpingöra kimbi ki ohoba jölöŋini jizal.

Möt nariba köuluköba mötmöt ölni miwikŋaibin.

²O urumelenj alaurupni! Esapesap könaŋi könaŋi qakŋine öŋgömakzawi, miaŋgöra uruŋinan mönö kude eri simbawoŋ miyök möta söŋgaiba malme. ³Esapesapnöŋ qakŋine öŋgöiga mötnarip-ŋinan miaŋgöreŋ köhöimakŋa ewö, mönö kapaŋ köla kin köhöimakŋe. Mi mötzeaŋgöra mönö söŋgaiba malme. ⁴Kapaŋ köla kin köhöimakŋe ewö, miaŋön mönö toroqeba mem letot enŋiiga ahakmemenjanö ölni pakpak mi aködamunŋambuk ahumakŋa. Miaŋön ahuiga Anutunöŋ oyaenŋoyaenjan uruŋini kokolak qeiga urugö yuai kungöra (meme amgöba) mözöqözöröŋ qahö aka malme.

⁵Enŋöreŋök kunŋan “Denöwö akŋam,” jiba mötkutukutugöra osizawi, yaŋön mönö Anutu köuluköiga mi waŋgima. Anutunöŋ kaleŋŋi sakalakŋi amqeba körek neŋgöra neŋgiba sirongen qahö jim neŋgimamgö mörakza. Miaŋgöra mi ölop waŋgiiga buŋa qem aŋguma. ⁶Köulukömawi, miaŋgöreŋ mönö niŋgimapkö möt nariba uruyahöt qahöpmahöp akŋa. Uruyahöt akzawaŋön mönö köwet sirigö dop öŋgöba eta ahakza. Luhutnöŋ köwet kunduriga laŋlaŋ anda kamakza. Miaŋgö dop akapuköra köulukŋaŋgö uruyahöt kude akŋa.

⁷Uruyahöt ambazip mewöŋi kunöŋ mönö Kembunöŋ yuai waŋgimapkö kude mötmörima. ⁸Yaŋgö uruŋan mönö julkuliga aiakaŋi pakpak miaŋgöreŋ kököloloŋ aka koŋgwarak qeba anqem-kamqem keu jimakza. Mewö.

Wanaŋŋi malmal aka pomŋi malmal

⁹Urumelenj alaurupni, enŋö sutŋine tosatŋan etqeŋeŋi malgetka Anutunöŋ enŋgöra möri öŋgöŋgöŋi akze. Miaŋgöra mönö ölop nanŋini möpöseim aŋgumakŋe. ¹⁰^bTosatŋan öŋgöŋgöŋi maljemö, moneŋ inapŋinanŋgöra qahö mötket öŋgömakzawaŋgöra aka etqeŋeŋi tandök mala mönö nanŋini möpöseim aŋgumakŋe. Yeŋgö malmalŋinan mönö buörö (roro) juranŋi ewö aka soholima. Etqeŋeŋi aka öŋgöŋgöŋi neŋön kömumba miaŋgöreŋ öröröŋ akin. ¹¹Wehönöŋ kota roro ohotiriiga qararaŋ köla soholiba juranjan bolonanimakza. Juranjan eriga kemaŋaŋgö kaisoŋgolomŋi eksihimŋambuk miaŋön piahimakza. Pomŋi yeŋön sukinapŋini mem sehimbingö lilikqilik ahakzemö, mala buörögö (rorogö) dop gororongöme. Mewö.

Esapesap (manambatok) ölopŋi aka bölöŋi.

¹²Anutunöŋ keuŋi kewö jöhöi ahöza, “Ambazip uruŋinan jöpaköm niŋgimakzei, nöŋön i malmal köhöikŋi enŋiba nörorŋine goul ila köl

^b 1.10-11 Ais 40.6-7

engimam.” Keu miangö dop bölöngö esapesapnön kungö qakne öngöiga miangören kapar köla köhöi teköiga mönö malmal köhöikngö ila sorom buja qem anguba oyaengkoyaen akna. Yangöra “I-ia simbawonj!” jizin. ¹³Bölöngö Tojan Anutu esapköm wangimawangö dop qahö aiga Anutunön kun singisöndok aknapkö qahö esapköm wangiza. Miangöra kunjan esapesap uruqe mala kewö kude jima, “Anutunön esapköm ningiiga singisöndok akngamgö akzal.”

¹⁴Anutunön qahöpmö, nanini sihim kömbönanjini bölöngan mönö töpötinj (nemban, pöran) ewö öröm neingiiga mötöp bitimnön qaköinga singisöndok esapesapni mewö mohot mohot neingören asuhumakze.

¹⁵Kunjan sihim kömbönanji bölöngi qahö jöhöba singisöndok kondotza. Kondoriga sihim kömbönanjan gölömjia ala singisöndok mi morö ewö meiga ahumakze. Singisöndoknön ahuba qarim teköba kömup köhöiknji ahum wangimakza.

¹⁶O wölböt alaurupni, sihim kömbönanjini bölöngan mönö kude tilipköm engima. ¹⁷Kalem ölöpnji aködamunjinambuk pakpak mi Anutunön ali Suep euyangörenök asuhumakza. Köinj wehön jenjiri kota kutuba geyohotka imutimutjiran körim törim ahakzapmö, asaknji pakpakö Tojan mönö nanjak qahö uteköma. Imutimut me söjaup kun mi yangören qahö ahöza. ¹⁸Anutunön yuai pakpak miwikngaiyöhi, nini miengö sutjine yambu dölökni jenjique aka malbingöra mörök. Miangöra nanji sihimngöngö dop keu öljangö kötnji urunine aliga miañön ahuahuh dölökni neingii ahuin. Mewö.

Buja keu öne mötpin me tem köla membini?

¹⁹O wölböt alaurupni, mönö keu ki mötmöriba kude ölum enguma: Injini mönö körek keu mötpingö kezap köropnji zilañ alme. Keu lañ mi ösumök kude jime. Irimnjinan mönö zilañ kude seholima. ²⁰Anutunön ahakmeme diñdijni akingö sihimnji mörakzapmö, irimesewölnön mia qahö kondorakza. Miangöra mönö irimesewöl mosöta keu ösöñ jiba malme. ²¹Qewöloñ könanji könanji aka ahakmeme töwötjambuknön qekötahözei, mia mosötme. Mönö yangisenjini mosöta Anutugö keu bapne anda keu kötnji uruqine kömörakzawi, mi möt angön köla malme. Mewö agetka keu miañön ölop amöt qem engiiga letota Suepnön öngöme.

²²Buja keu mi öne töhön mötketka ölnji qahö ahubapuk. Mewö silebile aka tilipköm angubepukmö, keu mi mönö köl guliba malme. ²³Kunjan keu öne töhöntöhön möta miangö dop qahö ahakzawi, yanñön mönö azi kiangö dop akza: Kunjan jemesoholnji piliknön uba angihakza. ²⁴Uba angeka mosöta kungen anda kaisongolomnji denöwö, mi ösumök ölum gemakza. ²⁵Mi ölöpnji qahöpmö, kunjan köna keu aködamunjangbuköra kezap ala ehiba miangören qekötahöba singisöndokö kösönöhök lolohomakzawi, yangö ahakmemegöra mönö “Esop simbawonj!” jibin.

Yañon keu möta mi qahö ölum qemakzapmö, mi ölña tem köla miangö dop ahakza.

²⁶Kunñan urumelenjö köl guliguli akñamgö jiba numbu jitñi qahö galöm köla nanñi mewö tilipköm aᅅgumakzawi, yañgö liñet köulukñan mönö yuai omañi, ölñi qahö akza. ²⁷Anutu Iwigahö jemesoholñe Buña nup sarakñi silebileñi qahö memamgö jiba mönö kewö akñan: Gwani morö aka malö köñjiliñ qakñe maljei, mönö i anda eñgeka köyan köl eñgiba malman aka gölmegö ahakmemenñagö qewöloñan urugi tölöhopapuköra galöm mem aᅅguba malman. Mewö.

Etqeᅅeñi mi kude eñgek qepureime.

2 ¹O urumeleñ alaurupni! Jisös Kraist Kembunini qetbuñañam-buk möt naribingö jize ewö, mönö ambazip tosatñi kude eñgek soriba tosatñi kude qepureim eñgimemö, dop mohotnöñ ak eñgiba malme.

²Miangö dopkeuñi kewö: Azi pomñi kun, kesötñi goul binenñambuk aka opo malukuñi ekjeritñambuk, yañon kambu miriñine öñgöiga azi wanapñi kun sileötañi jujuratñi töwötñambuk yañon mewöyök öñgöbawak. ³Öñgöyohotka iñini azi ipñi ekjeritñambuk mi köl öröm wañgiba kewö jibeak, “Ketañamnini, gi ölöp qaikñe eu anda dum tatat löwötñi miangöreñ tatman.” Mewö jiba azi etqeᅅeñi mi ehöröñ köla jime, “Gi ölöp göraᅅe anda kinman me köna kutukutunine eta tatman.” ⁴Silik mewöñan asuhuiga iñini könagesö sutñine köñjabö ala mendeñ aᅅguba qemasolokep aka keuñinambuk akze. Mötmötñini bölöñi wuatañ-göba jimtekötekö ambazip goñgoñi akze.

⁵O wölböt alaurupni, mötket! Anutunöñ bemtohoñi ambazip jöpaköm wañgimakzei, yeñgö buña ahömapkö keuñi jim köhöiba jöhöyök. Keu miangö dop tosatñan gölme ambazip jeñine etqeᅅeñi akzemö, Anutunöñ mi nanñañgöra jim möwölöhöm eñgiiga mötnaripñinañgöra aka öñgöñgöñi akze. Yeñon bemtohoñañgö uruñe aᅅgotketka galöm köl eñgiiga sukinapñinambuk akñe.

⁶Ölña öñgöñgöñi akzemö, iñini ambazip wanapñi eñgehöröñ köla eñgek siriba malje. Ambazip pomñi yeñon mönö moneñ inapñini qahöpköra kewöta mem et al eñgigetka etqeᅅeñi akze. Yeñon mönö iñini örörahöm eñgigetka keu jakeni jakeni miangöreñ aᅅgorakze. ⁷Iñini Kraistkö buñañi aketka qet ölöp sorokñi mi eñgiba miangö dop eñgoholakzemö, pomñi yeñon mönö qet mi luasönöñ ala lañ jimakze? Gölmegö öñgöñgöñi yeñon mönö mi pakpak ahakze.

⁸“Mewö ahakzemö, eñon Anutu bemtohoñañgö jöjöpañ keu bohonñi tem köla wuatañgögetka dop kölma. Anutugöreñ keuñi mi Buña Kimbinöñ kewö ahöza: “Nangi jöpaköm aᅅgumakzani, miangö dop mönö

ambazip tosatnji mewöjanök urugan jöpaköm engimakñan.”⁹ Mianjón dop kölmapi, injini ambazip tosatnji engek soriba tosatnji qepureim engiba dop mohotnön qahö ak engimakze ewö, mönö singisöndok ahakze. Anutugöreñ jöjöpañ keu walöngetka yañön mönö keuñini mi miwikñaiba jim teköm engima.¹⁰ Kunñan jöjöpañ keu pakpak tem köla wuatangöba miengöreñök mohotnön eta qezawi, yañön mönö jöjöpañ keu körek pakpak walönda keuñambuk akza.

¹¹ ^dMianjögö könañi kewö: Anutu “Sero yongorö kude akñan,” jiyöhañön mönö mewöjanök jöjöpañ keu kewö jiyök, “Ambazip kun kude qenön kömuma.” Gi sero yongorö qahö akzanmö, töndup kun köhömuñi qezani, mianjón mönö jöjöpañ keu körek walön teköba maljan.¹² Anutugöreñ köna keu mi singisöndokö kösönöhök lolohoba malbingöra ahöza. Anutunön köna keu mianjón kewöt neñgiba keunini jim teköi solanimegöra mötmöriba keuñini mianjögö dop jimakñe aka ahakmemeñini urukalem qakñe ahakñe.¹³ Kunñan urukalem qakñe ambazip qahö ak kömum engiba maliga Anutunön keuñi kewöta jim tetekönji ak kömukömu qakñe qahö ak wañgima. Kunñan urukalem kondela malöhi, Anutunön i kewöt wañgiba ölop ak kömum wañgiiga simbawon aka sileñi memba öngöma. Mewö.

Mötnarip ölni qahö mi köhömuñi akza.

¹⁴ O urumeleñ alaurupni, kunñan “Jisös möt narizal,” jiba mianjögö nupñi qahö meiga mötnaripñi mianjón mönö denöwö bauköm wañgibawak? Keuñanök möt nariiga Anutunön eka amöt qei letotma me qahö? Mi qahö!¹⁵ Mianjögö keuñi kun kewö: Uruñini meleñgeri, engö sutñine ambazip kunñan opo kerengöra osiba mözöröngöba neneñi wehön kungöra qahö malbawak.¹⁶ Mewö maliga engöreñök kunñan yambuk aitongöba silegö nañgönangö qahö wañgiba kewö jii mötpawak, “Gi ölop anda nene memba köñöp jömöta böñjön tatman.” Keu töhön mi möriiga mianjón mönö denöwö bauköm wañgibawak? Mi qahö!

¹⁷ Mewöjanök mötnarip töhönök mi köhömuñi akza. Mötnaripkö nupñi ölni qahö mezawangö mötnaripñan mönö qamöt ewö akza.

¹⁸ Kunñan kewö jibawak, “Gönön mötnaripuk aknönnga nöñön ahakmeme diñdiñi wuatangömakzal.” Nöñön mianjögöra kewö jimam, “Gönön ‘Anutu möt narizal,’ jiba mianjögö nupñi qahö memba öne mötnaripkahö ölni mönö denöwö kondel niñgibanak? Nöñön ahakmeme aka membi eknönnga mianjón mönö ölop nani mötnaripnañgö ölni kondel gihima.”¹⁹ Gi “Anutu mohok akzawi, mi möt narizal,” jizani, mi ölop! Ömewöröme yeñön mewöyök mi möt narize. Mi möt narizemö, mianjón kundut enjiiga Anutugöra jönömñini undumakza.

^d 2.11 Eks 20.13, 14; Dut 5.17, 18

²⁰O uruqahö azi, gi ömewöröme yeŋgö tandök möt narizan me? Mötnaripkö nupŋi qahö menöŋga ölni qahö ahui keu mi öne töhöntöhön jinöŋga mötnaripkan mönö yuai omaŋi, ölni qahö akza. Miaŋgö könai sopsöp keuni miaŋön kondel gihiza me qahö? ²¹“Qahö!” jibanbuköra sopsöp keu kun jimam. Mötnaripkö bömön jalönini Abraham yaŋön mönö denöwö diŋdiŋi ahök? Yaŋön Anutugö jitŋi tem köla nahönŋi Aisak waŋgita altanöŋ ala miaŋön jöwöwöl ohomamgö ahök. Mewö aka mötnarip qakŋe nup meiga Anutunöŋ mi eka keuŋi jim teköi solaniyök. ²²Sopsöp keu miaŋgö könai ek asarizan me qahö? Abrahamnöŋ möt nariba keuyök qahö jiyökmö, mötnarip qakŋe kinda miaŋgö silikŋi mewöyök ahiga nam köliga dop kölok. Ahakmeme diŋdiŋi aka memba maliga mötnaripŋan mewö qariba aködamunŋambuk ahök.

²³Buŋa Kimbinöŋ keu kun kewö ahöza, “Abrahamnöŋ Anutu möt narim waŋgiiga qetŋi Azi Diŋdiŋi jiyök.” Keu mi mönöwök ölnambuk ahuyöhaŋgö dop mi ohoget aka tosatŋan Abrahamgö qetŋi “Anutugö alaŋa!” mewö qeta jimalget. ²⁴Solanŋi akingöra mötnaripkö keu jitinananöhök jiinga qahö dop kölja. Silikninan mötnaripkö ahakmeme ölni akin ewö, Anutunöŋ mönö keunini jim teköiga solanibin. Kösohotnan mönö miaŋgö könai kondelja.

²⁵Sopsöp keu kun mewöyök jibiga mi kondelma: Israel yeŋön gölme ek kutubingöra azi yahöt melaim etkiŋet anohotka köna ketanŋi ambi qetŋi Reihab yaŋön etkuwaŋgita köyan kölni etkiba köna kunöŋ etkumbuliga mosöta anohot. Yaŋön mötnaripkö ahakmeme mewö ahiga Anutunöŋ mi eka keuŋi jim teköi solaniyök. Mewö.

²⁶Nöŋön keuni ki kewö jim tekömam: Azi uŋaŋi qahö mi qamötŋi. Miaŋgö dop mötnarip ahakmemeŋi qahö miaŋön mönö köhömuŋi akza. Mewö.

Numbu nesilamninan ayuhum neŋgibapuk.

3 ¹O urumeleŋ alaurupni, eŋgöreŋök gwötpukŋan uruŋini wahöriga (“Tosatŋi yeŋgöreŋ pinjit mindiŋgöbin,” jiba) kusum eŋgiŋgi böhi akingö akepek. Nini tosatŋi kusum eŋgiba nanini mötmötnini qahö mindiŋgöbin ewö, Anutunöŋ mi ehi qahö dop köliga keunini kewöta köhöikŋanök jim teköba miaŋgö dop likepŋi oŋgita ak neŋgima. ²Mi kewögöra jizal: Nini körekŋan köna keu gwötpuk qiwitipkömakzin. Kunŋan nesilamŋi galöm köla keu qahö qiwitipkömakzawi, yaŋön mönö azi aködamunŋambuk sorokŋi akza. Yaŋön ölop köhöiba malmalŋi pakpak mewöyök galöm köla malma.

³Hosnöŋ (beosi) sihimnini tem kölmegöra ain injup numbuŋine ala kösönöŋ öröba miaŋön ölop ölni ketanŋi jömuk mi mindiŋqindiŋ ak

° 2.21 Jen 22.1-14 † 2.23 Jen 15.6; 2 Hist 20.7; Ais 41.8 * 2.25 Jos 2.1-21

enjiinga anakze. ⁴Mewöyök waŋge ketani miengö silikini mötmörime. Mieñon ketani aketka luhut köhöik-ŋan nanğöm enjigetka köwet kutuba anakze. Keta bölökni akzemö, mi töndup anangö galömni pailöt yañon waŋge giliŋe tata sihimni wuatangöba stia lökuatni moröni miyök melenqeleŋ aiga waŋge ketanan miangö dop melenqda anakza.

⁵Nesilamgö könani mi mewöñanök. Mi sileninaŋgö kitipni morörökña kun akzapmö, töndup ölop keu ketani könani könani miañon silenini memba öñgöba jimakzin. Mönö ki mötmörinöñ anök:

Könöp jit-tökni moröñan terenqda geba ölop jölöm jitŋe möndöba arökni keta bölökni jem kutuiga etpawak.

⁶Nesilaminan mewöyök könöp bölam ewö akza. Mi sileni-naŋgö kitipni kitipni miengö sutŋine tata qewölongö kondotkondot namni akza. Mewö aiga könöp siagö Toñan jönbölanñan ohotiriba miangöreñ uwulamgöiga awamñanök urukönöpnöñ möndöba jeiga uru pakpak kutumutuba tölöhoiga malmalŋe ahakmemeni pakpak mi sanjöp ewö töwima. ⁷Anutunöñ yuai pakpak miwikñaiyöhi, mi sömbup könani könani, nei me yuai bapñinan köla ölölöñgömakzei me köwetnöñ maljei, mi ambazipnöñ mölöwörim enjimeangö dop akze. Mi lök köl tutuhuba mölöwörim enjigetka mire (köhömgep) akze.

⁸Mewö akzemö, nesilaminan mönö sömbup kalni tandök akza. Mi möröm warabe (röbek) miañon kokolak qeqeñi aka añamumu ewö öñöñgöba neñgöhöba mem kömum neñgimangö jöjörömakza. Ambazip körekñan mi mölöwöriba jöhöm wañgi-bingö osimakze. ⁹^hNesilaminan Kembu Iwinini möpöseim etkimakzin aka likepŋe ambazip nanñi kaisongolom ewö miwik-ñaim enjiyöhi, mi sait keunöñ lañ qesuahöm enjimakzin.

¹⁰Numbu nesilam mohok miañon Anutugö qetni möpösei-makzin aka sait keunöñ tosadni qesuahöm enjiba jimakzin. O urumeleñ alaurupni, könanamñinan mewö ahöi qahö dop kölja. ¹¹O sawölñi aka kömbukñambuk mi o jeni mohok miangöreñök uzumgöba korakzahot me qahö? Mewö qahö. ¹²O urumeleñ alaurupni, jogañ ipñeyök danam (sam) mi ölop asuhumakze me qahö? Mewöyök jaunöhök mandarina ölop asuhumakze me qahö? Miañgö dop o sawölñan köwuk kömbukñambuknöhök uzumgö-mangö osimakza. Mönö mi.

Mötkutukutu ölni aka muneni

¹³Enğö sutŋine dañon mötkutukutubuk aka keu mindiŋgö-mawañgö dop akza? Kunöñ “Mewö akza,” jime ewö, yañon mönö uruñi mötkutukutuñangö dop memba et ala silikñan guñböñjönjön ahakmemeni kondeli aukŋe asuhui ehinga dop kölma. ¹⁴Miañon

^h 3.9 Jen 1.26

dop kölmapmö, uruņine mututqutut ahöiga irimesesewöl mötököm-bukņambuk möta körögisigisi aka nanņini yuainöņ qarimapkōra köpösöņgōba andōqeqe ahakze ewō, mötkutukutuņini miangōra mönō sileņini öne kude memba öņgōme. “Keu ölni wuatangōzin,” jiba mönō ölni köyatibepuk. ¹⁵Yengōreņ mötkutukutu mewōņi mi gölmegō mötkutukutuya akza. Mi Suepnöhök qahō erakzapmö, ömewörōme yeņön ambazip sölölohöm eņgiget jigetka Uņa Törōņan miangōra wösöbirik ahakza.

¹⁶Denike yeņgō uruņine mututqutut ahöiga irimesesewöl möta körögisigisi aka nanņini yuainöņ qarimapkōra köpösöņgōmakzei, yeņgō malmalņine siksauk ilingōsöņ ahöiga silik aņgōjōrakņambuk kōnaņi kōnaņi wuatangōmakze. ¹⁷Mi wuatangōmakzemō, möt-kutukutu Suepnöhök erakzawi, miangō kōnaņi mutukņi mi ahakmeme sarakņi. Mötkutukutu sarakņangō silikņi tosatņi mi kewō: Luainöņ malbingō ak eņgiiga guņbōņjōņjōņ qakņe tosatņi ak eņgiba keu bapņe angetka Uņa Törōņan uruņini kokolak qeiga tosatņi baukōm eņgibingō sihimņi gwōtpuk mötketka urumōt-mōtņinaņgō ölni ölöpņi ölöpņi mi gwōtpuk asuhumakze. Geņmoņ mosōta ambazip keuņini bahōsapsap qahō kewōta silesile silik qahō malje. ¹⁸Luaiqeqe ambazipnōņ luainöņ malbingō möta miangō kötni kömōtketka ölni ahakmeme diņdiņi ahuiga oyaeņkoyaeņ malakze. Mewō.

Gölmegō mötkutukutu mosōta Anutugō ala aka malme.

4 ¹Wani yuainöņ bim aka aņgururuk sutņine kondori ahumakze? Nanņini sihim kömbōnaņinan mönō wahōta sileņini dop kölīga ölöpņi bölōņan awōraņgōyohotka bim aka aņgururuk ahumakze. ²Iņini yuai kōnaņi kōnaņi mēbingōra sihimņi köhöikņi bökbök mōrakzemō, mi eņgō buņaya qahō ahakza. Yuaigō eksihim möta erōm ota uruņinan kōnōp jeiga ambazip eņgugetka kōmumak-zemō, tōndup mi qahō memakze. Miangōra yom jiba aņgururuk aka bim qemakze. Iņini Anutugōreņ qahō köulukōba nanņinak öne mēbingō mötzeangōra mi qahō buņa qem aņgumakze.

³Anutugōreņ köulukōmakzemō, tōndup mi kewōgōra qahō memakze: Uruņinan qahō diņgiiga yuai eņgiiga mi mösöhōba nanņini sihim kömbōnaņini bölōņi meköba sileņinaņgō sösōņgai akingōra möta ulerakze. Mi qahō dop kölīga Anutunöņ mi aņgōn kölakza. ⁴O iņini qesabulum ambazip ewō akze. Awanōm kōna diņdiņi mosōta serowilin ahakzei, iņini mönō miangō dop Anutu mosōta urumeleņgō kōpa ambazip yembuk ala-ala aka moneņ inapnōņ görōken uruņini jöhōba malje. Tandök mewōņi aka miangōn mönō Anutubuk kerök-kerök ahakze. Mi möt kutuze me qahō? Miangōra kunņan gölmegō sihim kömbōnaņi bölōņi mekömamgōra uruņi alakzawi, yaņön mönō Anutugō kerökņa ahakza.

⁵Buŋa Kimbigö keu kun kewö ohoget ahöza, “Uŋaŋi Töröŋi urunine al nengii maljawi, Anutunöŋ i sihim kömbönaŋi mieŋön kokolak qem waŋgiiga malja.”ⁱ Keu mi omaŋa könaŋi qahö mötmörībepuk. ⁶Keu mi omaŋa qahöpmö, iŋini miangö dop sihimŋini törörök Anutugöreŋ alme ewö, yaŋön mönö kalem möriamŋi önöŋi qahö eŋgimakŋa. Miangöra Buŋa Kimbi ki jiba ohoget ahöza: “Anutunöŋ söŋgöröqök ambazip tuarenjoŋ ak eŋgimakzapmö, uruŋini memba et alakzei, ia kalem möriam eŋgimakza.”

⁷Miangö dop iŋini mönö uruŋini kewöta Anutugö keu bapŋe anda malmemö, Bölöŋaŋö Tonji tuarenjoŋ ak waŋgigetka eŋgömosöta sööröiba miŋgöba anma. ⁸Mönö Anutubuk jöhöjöhö aka kösutŋe kagetka yaŋön embuk jöhöjöhö aka kösutŋine kinma. Siŋgisöndok megetka böröŋinan töwiiga Jisösgö sepŋan mi saŋoŋmapkö köuluköme. Uruŋinan julkuliga an qem kam qem laŋ aketka uruŋinan tölöhoiga kök könjörat eŋgi sarakŋi akŋegöra köulukömakŋe. ⁹Mönö dabökörökroŋini möt kutuba iŋgeŋ köla wösöbirik möta silata sahötme. Göŋ köisirikŋini mosöta melenŋda amburereŋ akŋe. Sösöŋgaiŋini mosöta wösöbirik möt aŋgume. ¹⁰Mönö Kembugö jeŋe memba et al aŋgugetka yaŋön mem wahöt eŋgima. Mewö.

Urumeleŋ alaurup kewöta keuŋini kude jim teköme.

¹¹Urumeleŋ alaurup, andönöŋ qeŋe keu mönö kude jim aŋguba malme. Kunŋan keu mewö yöhösaŋ jiba urumeleŋ alaŋaŋgö keuŋi jim teközawi, yaŋön mönö Anutugöreŋ köna keu jim teköba memba et alja. Gi Anutugöreŋ köna keu jim teköba göragöra ala mewö miangön mi qahö tem kölakzanmö, mi silebile memba timbiqimbilim azia aka maljan. ¹²Anutunöŋ köna keu jim kutum neŋgiba miangö dop mönö keunini kewöta jim teköiga ayuhubin me ak kömum neŋgiiga oyaenŋkoyaen akin. Yaŋönök jimtekötekö Tonini akzapmö, gi mönö nangahöra “Niŋia akzal?” jiba alagi kewöta keuŋi jim tekömakzan? Mewö.

Sile memegö galöm keu

¹³^kMönö kezap alget! Tosatŋi iŋini sile memba kewö jimakze, “Nini merak me uran ki mosöta taon mi me mi miangöreŋ anda kölköl-örörö aka moneŋ ketanŋi öröba yambu (yara) mohok malin teköiga miangöreŋ liliŋgöba kabin.” Nöŋön miangöra kewö jibi mötme: ¹⁴Malmalŋini uran denöwö malmei, iŋini mi qahö möt kutuze. Eŋgö malmalŋinaŋgö könaŋi mi denöwö? Mi köwak kousugö dowä ahözawa, nalö töröptökŋi asuhuba

ⁱ 4.5 Buŋa Kimbigö keu miangö könaŋi kun kewö, “Uŋa Töröŋi uruŋine ali maljawi, yaŋön jöpaköm neŋgimamgö sihim kömbönaŋi möta neŋgöra mututqutut mörakza.” ^j 4.6 Qam 3.34 ^k 4.13-14 Qam 27.1

ayapköma. ¹⁵Miaņgöra eņön mönö kewö jigetka dop kölma, “Kembugö jit sihitņan neņgöra mewö ahöiga jebuk malbin ewö, mönö mewö mewö aka membin.” ¹⁶Mewö qahö jimakzemö, öne töhön jakbak-oraņböraņ aka nanņini sileņini memba öņgöba möpösei-makze. Ahakmeme pakpak mewöņi miaņön mönö bölöņi akza.

¹⁷Keuni jim tekömamgöra kewö jizal: Kunņan silik ölöņņi aka memawaņgö dop aka miaņgö könaņi möt kutubagun mi qahö aka memawi, yaņön mönö siņgisöndok akza. Mewö.

Ambazip sukinapņinambuk yeņgö galöm meme keu

5 ¹O ambazip sukinapņinambuk, iņini kezap ala keuni ki mötket: Kahasililiņ sihimbölä qakņine öņgömawi, miaņgöra mönö amburereņ aka silata sahötme. ²¹Moneņ sukinapņinan mönö gisahöba gororoņgöza. Kezaploņloņ jijilukut yeņön opo malukuņini yöhöqöhötiba nemakze.

³Iņini nalö teteköņi kewöņe goul, silwö aka yuai tosatņi qaknöņ qaknöņ qezaköget ahözawi, mi kahawet muetmuetnöņ turum teköba törom (rust) memba ahöza. Törom kahawet miaņön dangunu ewö ahöba könaņini nalö teteköņe kewö kondelma: Iņini malmalņini moneņ inapnöņ jöhöba mösöhögetka pömsöm qeiga ayuhume. Törom kahawet miaņön mönö könöp bölam ewö sile busuņini mewöyök mem bölima. ⁴^mKi mötmöriget: Nup meme ambazip nupņine barö memba siri uret qözöla malgeri, iņini yeņgö töwaņini ekbonep möta aņgön kölget. Iņini yeņgöreņ sahöt irikurukņini mötze me qahö? Silatņini miaņön mönö Kembu Anutu, kukösum pakpakö Toņaņgö kezapņe gem teköiga mötza.

⁵Iņini gölmenöņ ki yuai könaņi könaņi sesegilgil buņa qem aņguba siyoņsayoņ qahö mala silegö sösoņgai algetka nahömnini dop köl eņgiiga malget. Gölmegö kelök möriamņan jöhöm eņgiiga laņ mala nem qarip ketaņi aka malje. Anutunöņ keuņini jim teköiga eņguget kömumeaņgö nalöņinan kam kuņgumawi, mönö nalö miaņgöra jöjöröba kelökņinambuk aka malje. ⁶Ambazip qewöloņini qahö iņini qahö tuarenöņ ak eņgigetka töndup keuņini jim teköba laņ eņguget kömumba malget.ⁿ Mewö.

Lömböt mökösoņda bisiba köuluköba malme.

⁷O urumeleņ alaurupni, iņini Kembunöņ kaņgotmapköra mamböta nalö sutņe kiaņgöreņ mönö mökösoņda lömböt bisiba kinme. Mewö kinda kölkömöt azigö tandökņi mötmörimme: Yaņön nene gölmenöņ

¹ 5.2-3 Mat 6.19 ^m 5.4 Dut 24.14-15 ⁿ 5.6 Keu miaņgö könaņi kun kewö: Iņini azi qewöloņi qahö töndup keuņi jim teköba qegetka kömuyöhi, yaņön iņini kunbuk qahö qetal eņgimakza.

kömöta kinda ölni söngöröni öngöngöni asuhumapköra kapaŋ köla mambörakza. Kapaŋ köla mamböta mali maliga kie bedu nalöŋan kaiga kunbuk mamböriga kömunjaŋ kie uru nalöŋan kam kuŋgumakza. ⁸Enjön mewöŋanök mönö mökösoŋda lömböt bisiba kinme. Kembunöŋ kunbuk kamawaŋgö nalöŋan törizawaŋgöra aka mönö uruŋini qezaköba böŋ qeba kinme.

⁹O urumeleŋ alaurupni, Anutunöŋ keuŋini jim teköi lömböt miwikŋaibepuköra mönö nanŋini sutŋine jimongot kude aka uruŋinan irikuruk kude jim aŋgumakŋe. Mötket, jimtekötekö Toŋan mönö dopdowiba nanŋunöŋ kinja. Mewö. ¹⁰Urumeleŋ alaurupni, kezapqetok ambazip yeŋön mönöwök Kewbugö qetŋe Buŋa keu jigetka kahasililiŋ mem enŋigetka möta töndup mökösoŋda lömböt bisiba kapaŋ köla malget. Enjön mönö yeŋgö tandökŋini mötmöriba köna lasupŋini wuatangöba malme. ¹¹Tosatŋan kapaŋ köla lömböt bisiba mala luhut algeri, nini yeŋgöra “I-ia simbawoŋ!” jizin. Azi qetŋi Job (Hiobe) yaŋön kahasililiŋ möta töndup kapaŋ köla luhut alöhi, mi mötze. Luhut aliga teteköŋe miaŋgöreŋ Kembunöŋ ak kömukömu Toŋi aka neŋgehorimakzawi, yaŋön mönö oyaenŋkoyaenŋi waŋgiiga malök. Mönö mi mötmörime. Mewö.

¹²^PO urumeleŋ alaurupni! Keu kötŋi mutukŋi kun ki jimam. Inŋini keu mi me mi jimei, mi jöjöpäŋ keunöŋ kewö kude jim köhöime, “Keuni ölni qahö akza ewö, Suep Toŋan ölöp lömböt ali qakne öngöma me gölme toŋan mereŋ mumbaköiga gölmenöŋ turum niŋgima.” Keu mi me jöjöpäŋ keu tosatŋi mewöŋi miaŋön mönö keuŋini kude jim köhöime. Mewö qahöpmö, oŋ-keugöra möta “Oŋ!” miyök jime aka qahöp-keugöra “Qahö!” jime. Pötagororoŋ keu jigetka Anutunöŋ keuŋini jim teköba likeŋŋi meleŋni qakŋine öngöma. Mewö.

Mötnariŋ qakŋe köulukögetka ölni asuhuma.

¹³Mötnariŋ ambazip enŋöreŋök kunŋan qemjem-mamje-ŋambuk malja ewö, yaŋön mönö Anutu köuluköma. Kunŋan sösoŋgainöŋ malja ewö, yaŋön mönö liŋet köla Anutu möpöseima. ¹⁴Enŋöreŋök kunŋan kawöl yöhöi malja ewö, yaŋön mönö mötnariŋ könagesögö jitŋememe öröm enŋiiga kaba Kewbugö qetŋe kelöknöŋ sileŋe miriba yaŋgöra köuluköme.

¹⁵Mötnariŋ qakŋe köulukögetka Kembunöŋ kawöl ambazip mi amöt qem waŋgii ölöwaka kunbuk wahötma. Siŋgisöndok aka kawöl miwikŋaiyök ewö, Anutunöŋ mönö siŋgisöndokŋi mi saŋgoŋda mosötma.

¹⁶Mewö aiga Anutunöŋ amöt qem enŋii ölöwakŋegöra mönö siŋgisöndokŋini jim miwikŋaim aŋguba bauköm aŋguba Anutugö köulukömakŋe. Ambazip solanŋi kunŋan uruŋi qezaköba Anutu

° 5.11 Job 1.21-22; 2.10; Sum 103.8 P 5.12 Mat 5.34-37 ¶ 5.14 Mak 6.13

köulukömawi, miangö öljan mönö wewelipnjambuk asuhuma. ¹⁷ʼMiangö söpsöpni kun mi kezapqetok azi qetji Elaija (Elia). Yañon gölme azi naninañgö dowa malök. Yañon kie qahö kamapköra uruñi qezaköba kapañ köla köuluköiga kienöñ yambu (yara) karöbut aka köiñ 6 miangö uruñe gölmenöñ qahö erök. ¹⁸ʼNalö mi teköiga kunbuk köuluköiga suep injañ köla kie yöhöba bedu meiga nene kunbuk töñgöniba asuhuyök. Mewö.

Kunöñ jañjuñ aniga alañan bauköiga dop kölma.

¹⁹Urumelej alaurupni, eñgöreñök kunöñ keu öljanñgö könani qiwitipköba jañjuñ aniga kunñan i miwikñaiba köna ölñe kunbuk wañgita alma ewö, ²⁰ʼmiangöra mönö kewö mötmörime: Siñgisöndok ambazip kunñan jañjuñ könaje aniga alañan i miangöreñök wañgiriga uruñi löwörii kunbuk melejñmawi, yañon mönö qahö kömum köhöima. Alañan i könöp sianöñ gebapüköra añgön köl wañgiiga Anutunöñ siñgisöndokñi sehisehiñi mi sañgoñda köl turuma. Mewö.

ʼ 5.17 1 Kiñ 17.1; 18.1 * 5.18 1 Kiñ 18.42-45 † 5.20 Qam 10.12; 1 Pitö 4.8